

Inatsisartut Suleriaasianni § 33, imm. 4 naapertorlugu aalajangiiffigisassatut siunnersuut manna Naalackersuisut saqqummiuppaat:

**Uunga siunnersuut: Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiuunnissaq pillugu IAEA-imi nunani tamalaani isumaqatigiisummut (Ikiuunnissamut nunani tamalaani isumaqatigiisut) Namminersorlutik Oqartussat akuersinissaat pillugu oqaaseqaateqarnissaq pillugu Inatsisartut aalajangiiffigisassaattut siunnersuut (Inuussutissarsiornermut, Suliffeqarnermut, Niuernermet Nunanullu Allanut Naalackersuisoq)**

#### **Tunngavilersuutit**

Siunnersuut inassuteqaatit ”Uranimik piianeq avammullu annissuineq pillugu nalunaarusiaq”-mi allassimasut ilagaat. Ikiuunnissamut nunani tamalaani isumaqatigiisut, aatsitassanik qinngornernik ulorianartunik akulinnik piianermet toqqaannartumik tunngassuteqanngilaq, tamatumunnga taarsiullugu atomip nukinganik pissuteqartumik ajutoortoqarneranut imaluunniit qinngornernik ulorianartunik pissuteqartumik ajornartorsiortoqalerneranut atatillugu ikiuunnissamut tunngassuteqarpoq.

#### **Nunani tamalaani isumaqatigiisutip imarisai:**

Nunani tamalaani isumaqatigiisut, annertuumik ajutoortoqartillugu, nunani tamalaani isumaqatigiisummi peqataasut akornanni ikiuteqatigiinnissamut periarfissaqarnermet tunngassuteqarpoq.

Ikiuunnissamut nunani tamalaani isumaqatigiisut, atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiuussinnaanissaq/ikiorneqarsinnaanissaq pillugu naalagaaffiit nunani tamalaani isumaqatigiisummi ilaasortaasut aamma IAEA-p akornanni suleqatigiinnissamut tunngassuteqarpoq.

Nunani tamalaani isumaqatigiisummi siunertaavoq, ajutoornerni ataasiakkaani aalajangersimasuni sukkasuumik sunniuteqarluartumillu suleqatigiinnernik pilersitsinissamut sinaakkutissiinissaq; naalagaaffiit ilaasortaasut ajutoortoqartillugu imaluunniit ajornartorsiortoqalersillugu naalagaaffinnut ilaasortaasunut allanut isumalluutit atugassiissutigineqarsinnaasussatut naatsorsuutigineqarsinnaasut IAEA-imut ”nalunaarutigalugit ilanngutsissavaat”, taamatullu naalagaaffiit ilaasortaasut ikiuunnermik piviusunngortitsinissamut inatsisitigut suleriaatsitigullu tunngaviusussanik ”qulakkeerissallutik”, ilanngullugu atortunik sulisunillu sukkasuumik sunniuteqarluartumillu annissinnaanissaq eqqussinnaanissarlu, taamatullu naalagaaffiit ilaasortaasut ikiuunnermi sulisut pisinnaaffinnik eqqartuussisulersuunneqarsinnaannginnernillu pisariaqartunik naleqquttunillu qulakkeerissutissallugit.

### **Pisortanut allaffissornikkut aningaasaqarnikkullu sunniutaasussat**

Nunani tamalaani isumaqatigiissut naalagaaffiit ilaasortaasut inatsisitigut imaluunniit aningaasaqarnikkut pisussaaffiit immikkuullarissunik imaqanngilaq; ”pisussaaffiit” ilaatinneqartut qulakkeerneqassapput, kisianni nunani tamalaani isumaqatigiissut piunasaqaatinik imaluunniit pisussaaffinnik immikkuullarissunik innersuussuteqanngilaq, taamaattumik tamanna pillugu periaasissanik killilersuisoqarani. Nunani tamalaani isumaqatigiissutip ataani pisussaaffinnik naammassinninnissamut, ilaatigut akileraartarnermut aamma pinerluttulerinermut inatsisini allannguuteqartitsisoqartariaqassaaq.

### **Inuussutissarsiortunut allaffissornikkut aningaasaqarnikkullu sunniutaasussat** Soqanngilaq

#### **Attaveqaqatigiinneq**

Oqaaseqaateqartoqareernerani, Kalaallit Nunaanni atuutsitsilernissaq siunertaralugu, oqartussaasut attuumassuteqartut attaveqarfigineqassapput.

#### **Tusarniaaneq**

Inatsisartut aalajangiiffigisassaattut siunnersuut Naalackersuisusut tusarniaanermut nittartagaanniippoq 12. Juni-miit 6. aggustimut 2015. Tusarniaassut tiguneqarsimannngilaq.

Taamatut oqaaseqarlutik Naalackersuisut inassutigaat, atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiunnissaq pillugu IAEA-imi nunani tamalaani isumaqatigiissut Namminersorlutik Oqartussat akuerissagaat, Inatsisartut aalajangissasut.

#### **Ilannussat:**

- 1) Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiunnissaq pillugu Det Internationale Atomenergiagentur-imi nunani tamalaani isumaqatigiissutip naalisarnera
- 2) Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiunnissaq pillugu IAEA-imi nunani tamalaani isumaqatigiissut (Ikiunnissamut nunani tamalaani isumaqatigiissut)